

雍

錄

關中叢書

雍錄

邵力子署

雍錄序

雍錄十卷宋龍圖學士程文簡公大昌之所著也謂漢隋唐皆都渭南雖稍遷改而相距不遠尙爲易攷若夫周秦兩世自初興以至遷滅屢東屢西不常厥邑固不可循世次地望泛而言之於是以渭爲經取五代都地隨列渭旁能沿渭以推其方而雍關地望如指諸掌矣此其書之大概而其雜相攷會則悉本之潘岳關中記與三輔黃圖六典長安志及呂圖閣圖所以述雍之故蹟小大靡遺矣然所圖或有差誤皆按冊擬議而與圖閣產其地而親見之者不同予是以傷載記者之難言也往歲予友大復何子

仲默嘗爲雍大記顧其書垂成而卒悲夫昔仲默蓋嘗親以序列屬予矣顧今猶未逮固深念其用心之勤期有暇日卒成其書剏厥所託不知能否也知西安府南埤李侯文極政通民和之餘盡取關中故志刻之以傳秋七月省災過邵因以雍錄屬予爲序於是著所私見於首以貽考古之士然關中之蹟大抵諸書幸存得有所攷讀其書者又當有以識侯之用心焉可也

嘉靖辛卯秋八月丁亥邵濟西山人康海序

五代都雍總說

漢隋唐皆都渭南雖位置稍有遷改而相去不踰二三十里尙易攷矣若夫周秦兩世自初興以至遷滅屢東屢西不常厥邑若但循世次地望泛而言之則先後紛紜亦與散在史冊無異予於是立渭爲經而取兩代都地隨列渭旁人能並渭以推其方而關雍地望如指諸掌矣渭之源出隴西鳥鼠同穴山稍東則受秦水秦水者天水郡水也秦始封在此也故曰西垂也又東則大散關水入之又東爲陳倉縣秦文公於此得寶雞故又爲寶雞縣也及至武功縣則受斜水矣褒斜二水介衙嶺而分南北此之斜水

卽二水之北派也斜逕武功而東入于渭也又東爲櫟縣

卽后稷始封之櫟櫟卽郃也所謂有郃家室者是也又東

逕雍縣

鳳翔府天興縣

秦惠公之故居祈年橐泉皆在是也

又東爲雍縣城南則秦德公居焉秦漢五時皆在其地也

五時詳在後

又東合漆水爲岐水大王立都渭北而兼跨

周原故合兩地而稱岐周也

詳見周都岐周下

又東逕槐

里縣南卽周懿王所都也古名犬丘則爲畜牧之地耳至

秦改名廢丘以示周世不復興也項羽所立三秦此爲雍

王章邯之國也廢丘對東則澇水自此入渭矣而秦之上

林包澇水而對廢丘故水經謂爲上林故地也其曰故者

秦舊也以別於漢武之所廣也渭又東則受豐水豐旁卽周文王所都也又東北行則漢便門橋橫互其上此時渭方自西南來未全折東故便門橋得以橫絕而徑達興平也

武帝造茂陵於興平興平卽廢丘槐里也此橋趨茂陵

爲便也

又東則爲鄠水鎬卽周武王之都蓋與豐都東西

對立也又東逕磁石門者阿房之西門也

見水經

又自此

門東行始與阿房南北相對故知此門當在阿房之西不

當在阿房之北也又東逕漢渭城之南卽秦咸陽矣

唐咸

陽縣在秦都西三十餘里

秦之咸陽孝公所都也在漢長

安西北角故漢書紀高帝項羽自霸上而入秦都皆曰西

上咸陽也惟元和志則曰正東維南是爲雍州則東多南
少也志蓋審言其詳也

並用水經參以它證

漢都長安其

城在渭之南而咸陽之東南也隋都亦在長安實漢城東
南十三里隋文名其城爲大興城唐高祖因之遂以爲都
凡其宮朝城市悉用隋舊第稍更易故名而已唐之都城
先統於雍州京兆府最後始名上都也高宗時於大興城
之北東別建大明宮故號東內而大興城遂名西內也西
內卽唐太極宮也別有興慶宮在太極東南角又名南內
也

總敘雍

禹貢黑水西河惟雍州言雍州之境西南則包黑水而東距冀河也冀河龍門河也堯都冀州龍門河正在其西故曰西河也

詳見禹貢論

黑水遠矣在唐爲小勃律以及交

廣皆是若流沙則又出葱嶺之西也予之此錄專以五代帝都爲言凡五代帝都其在禹貢雍州之境纔十之二三耳而予全舉雍名者如堯都平陽而遂該括全冀名以冀方非失實也秦嘗名其都爲雍縣唐嘗名其州爲雍州皆本禹貢也雍壅也四面有山壅塞爲固也

關中

潘岳關中記曰秦西以隴關爲限東以函谷爲界二關之

間是爲關中此說未盡也函關固秦所立矣而鳳州之散

關

周尹喜嘗爲令

隴西之隴關商州之武關原州之蕭關

藍田之嶢關

藍田縣卽藍關也

其名皆已先秦而出秦又

自命其國土以爲關中則凡地在四關之內者皆當繫關以爲之名也若專指函谷一關則不該矣故顏氏注高紀曰自函谷關以西總名關中而徐廣注項羽關塞之語曰東函谷南武關西散關北蕭關其說是也其他如大震關之在隴州瓦亭關之在原州駱谷關之在整屋子午關之在長安蒲津關之在同州華陽關之在洋州雖建置皆在秦後至其設險守國而命之爲關則凡此數者皆當在數

也故潘岳所記不如顏徐二說之該也曰其關者培土束
隘中立之門晨啓而莫閉之也孟嘗君詐爲雞鳴以誤關
吏門開乃始得出高祖不納它軍已而英布攻破之漢世
函關門牡又嘗飛而它逸則固明有扉闔而夫形容關門
之狀者至曰天形如足練則其規制可見矣不與壁壘同
爲一制也終軍入關復裂帛問此何爲曰爲復傳復傳者
回時以半帛合符爲信也然則初從此關得帛而入他日
出關又持此帛爲驗則是元自東入者不容西出也耶

三輔叛置

三輔黃圖曰三輔者主爵中尉及左右內史武帝改曰京

兆尹左馮翊右扶風

地理志武帝建元六年置左右內史

共治長安中是爲三輔郡皆有都尉又曰京兆在故城南冠里馮翊在故城內太上皇廟西扶風在夕陽街北此其廢治之所也至百官表顏師古注引黃圖則曰長安以東爲京兆以北爲左馮翊渭城以西爲右扶風則三輔分境之詳也武帝展拓上林東方朔曰如天不爲變則三輔之地盡可爲苑何必整屋鄠杜乎案朔所諫尙在建元年中而三輔立名乃在六年朔不應得以預言此必史家追爲之辭也師古曰中尉及左右內史則爲三輔不必京兆馮翊扶風此說蓋強加護飾焉耳卽顏序自謂不肯攻擊本

文者皆此類也唐通以關內道爲畿內而中置京兆府立尹以治之城中立兩縣自太極宮前朱雀門外至啓夏門內中分通衢以爲縣境其東則隸萬年而西隸長安亦放漢也

三輔黃圖

今世所傳三輔黃圖敍載漢制特詳最爲要書而其間有與正史不合者如武帝思子宮在湖湖渭南也萬歲宮在汾陰汾陰河東也而圖皆以其宮隸諸甘泉甘泉自在渭北此非明誤耶甘泉有三惟鄠之甘則與湖縣俱在渭南而鄠之與湖中隔都城不相附綴則其誤曉然矣其次晉

灼所引謂爲黃圖者多今書所無雖今書亦自明引某說
本諸舊圖也則今書固非古書矣於是漸臺彪池高廟元
始祭社稷儀今書皆明言祖本舊圖也又有引顏師古語
爲據者師古唐人也漢世安得預引而言之又嘗命槐里
爲興平興平之名乃唐至德二年所改又在肅宗時也然
則今圖蓋唐人增續成之初非親生漢時目擊漢事者也
故隨事必當立辨不可謂其名古而不敢置議也

唐六典

唐世制度凡最皆在六典或云書成不嘗頒用今案會要
則牛僧孺奏升諫議爲三品用六典也貞元二年定著朝

班次序每班以尙書省官爲首用六典也又其年竇參論
祠祭當以監察洫之亦援六典也此類殆不勝述何以遂
言不嘗頒用也草制之官每入院必首索六典則時制盡
在焉故也其書蓋張九齡之所上而李林甫之所注今其
卷首直冠林甫之名而九齡如無預惟會要能言其以曰
開元二十七年中書令張九齡所上則其書成於九齡爲
相之日矣然於其間有異九齡二十三年已罷中書令而
林甫代爲之則注成而上或在二十七年而書之進御當
在二十四年也

長安志

長安志者本朝宋敏求所著也古有長安記矣至此改記爲志明非一書也宋氏家多書如宮闕記宮闕疏關中記廟記三輔黃圖三輔舊事皆所采據矣而制度因革則多本諸圖經圖經又皆本之梁載言十道志也李吉甫元和志比宋志則差略然宋氏專記關雍而關雍之在元和志僅居百一其詳略自當不侔也凡求關雍曲折者宋之此志引類相從最爲明悉然而細細較之亦不免時有駁複也且如曲臺旣入未央而又入諸三雍是分一爲二矣長門宮在都城之外長門亭畔而列諸長信宮內則失其位置矣諸如此類豈可苟隨無所可否也况宮殿苑囿也者